

26/01/2002

Nik Aziz anggap kenyataan tidak pesong akidah

KOTA BHARU, Jumaat - Menteri Besar, Datuk Nik Abdul Aziz Nik Mat hari ini menegaskan dakwaannya rakyat Kelantan yang mengundi Pas pada pilihan raya umum 1990 mendapat pahala kerana membantu membersihkan negeri itu daripada amalan riba, tidak memesonkan akidah umat Islam.

Malah, beliau menyatakan kesanggupan bersemuka dengan mana-mana pihak yang berasa kurang senang mengenai dakwaannya itu.

"Benda (perkara) apa yang saya pesongkan? Kalau saya kata orang sembahyang dapat pahala, pergi Makkah (menunaikan haji) dapat pahala... adakah saya jadi macam Tuhan?"

"Kalau kenyataan seperti itu pesongkan akidah (umat Islam), tutuplah semua sekolah agama. Al-Quran jangan beri, tok guru jangan beri ada, universiti pun jangan ada. Jabatan Islam sebab profesor mengaku nak jadi Tuhan belaka," katanya.

Beliau berkata demikian kepada pemberita selepas menyampaikan kuliah agama di Bangunan Pas negeri di sini, hari ini.

Kelmarin, Nik Aziz mendakwa rakyat Kelantan yang mengundi parti itu pada pilihan raya umum 1990 mendapat pahala kerana membantu membersihkan negeri itu daripada amalan riba.

Malah, beliau mengandaikan sekiranya Nabi Muhammad hidup kembali dan melawat Kelantan, Baginda akan selesa di negeri itu kerana dasar pemerintahan bercorak Islam yang diamalkan Pas sejak hampir 12 tahun lalu.

Semalam Perdana Menteri, Datuk Seri Dr Mahathir Mohamad dilaporkan berkata, Pas tidak pernah menghiraukan penggunaan agama asalkan mendapat sokongan rakyat.

Nik Aziz juga memang mengharapkan pihak lain membalas dakwaannya dan akan melakukan perkara sama jika ada pihak mengeluarkan kenyataan.

"Kita berunding... saya cakap orang lain jawab, dia orang cakap, saya jawab. Bagaimanapun, jangan sampai dok sumpah 'stupid people' (orang bodoh)... itu bukan jawapan, itu luahan nak marah. Marah ni tanda tak boleh jawab dan tak boleh jawab tu tanda salah.

"Saya memang nak sangat muzakarah antara dua pihak dan di tengahnya al-Quran sebagai hakim.

"Saya dah kata semua perkara di dunia ada kaedahnya. Kalau nak kaya, berniaga. Kalau nak pandai, belajar dan kalau nak sihat, makan ubat. Adakah ini bererti saya buat ketentuan?"

"Kalau salah, tutuplah universiti dan bank... nak berniaga buat apa sebab semuanya salah belaka," katanya.

(END)